

# Sundreglur FINA 2017–2021



**FINA**  
WATER IS OUR WORLD



Sundsamband Íslands  
September 2017

## Efnisyfirlit

SW 1	STJÓRNUN SUNDKEPPNA.....	- 3 -
SW 2	EMBÆTTISMENN .....	- 3 -
SW 2.1	YFIRDÓMARI.....	- 3 -
SW 2.2	TÍMATÖKUSTJÓRI .....	- 4 -
SW 2.3	RÆSIR.....	- 4 -
SW 2.4	RIÐLASTJÓRI .....	- 5 -
SW 2.5	YFIRSNÚNINGSDÓMARI .....	- 5 -
SW 2.6	SNÚNINGSDÓMARAR.....	- 5 -
SW 2.7	TÆKNIDÓMARAR.....	- 6 -
SW 2.10	YFIRMARKDÓMARI – sé þess krafist .....	- 7 -
SW 2.11	MARKDÓMARAR – sé þess krafist.....	- 7 -
SW 2.12	SKRÁNINGAREFTIRLIT (Desk Control).....	- 7 -
SW 2.13	ÁKVARÐANIR EMBÆTTISMANNA.....	- 7 -
SW 3	NIÐURRÖÐUN Í RIÐLA, UNÐANÚRSLIT OG ÚRSLIT .....	- 7 -
SW 3.1	RIÐLAR .....	- 7 -
SW 3.2	UNÐANÚRSLIT OG ÚRSLIT .....	- 9 -
SW 4	RÆSING (start).....	- 9 -
SW 5	SKRIÐSUND.....	- 10 -
SW 6	BAKSUND.....	- 10 -
SW 7	BRINGUSUND .....	- 11 -
SW 8	FLUGSUND.....	- 11 -
SW 9	FJÓRSUND .....	- 12 -
SW 10	KEPPNIN .....	- 12 -
SW 11	TÍMATAKA .....	- 13 -
SW 12	HEIMSMET.....	- 14 -
SW 13	VERKLAGSREGLUR FYRIR SJÁLFVIRKA TÍMATÖKU.....	- 16 -
	ALDURSFLOKKAREGLUR – SUND .....	- 17 -

Í gildi frá 21. september 2017

## SW 1 STJÓRNUN SUNDKEPPNA

**SW 1.1** Mótsstjórn sem skipuð er af mótshaldara hefur dómsvald í öllum málum nema þeim sem reglur segja til um varðandi yfirdómara, dómara og aðra embættismenn. Hún hefur vald til að fresta greinum og gefa skipanir í samræmi við samþykktar reglur um stjórnun sérhverrar sundgreinar.

**SW 1.2** Á Ólympíuleikum og heimsmeistaramótum skal stjórn FINA tilnefna eftirfarandi lágmarksfjölda embættismanna til framkvæmdar keppinnar:

- yfirdómari (2)
- tímatökustjóri (1)
- tæknidómarar (4)
- ræsar (2)
- yfirsúningsdómarar (2, 1 við hvorn laugarenda)
- snúningsdómarar (1 við hvern brautarenda beggja vegna laugar)
- aðalritari (1)
- riðlastjórar (2)
- þulur (1)

**SW 1.2.1** Á öllum öðrum alþjóðlegum sundmótum skal mótsstjórn tilnefna sama fjölda embættismanna eða færri að fengnu samþykki viðkomandi stjórnenda, svæðisbund-inna eða alþjóðlegra, eftir því sem við á.

**SW 1.2.2** Þar sem sjálfvirkur tímatökubúnaður er ekki til staðar, verður í staðinn að vera yfirtímavörður, einn (1) tímavörður fyrir hverja braut og einn (1) aukatímavörður.

**SW 1.2.3** Yfirmarkdómari og markdómarar mega vera til staðar þegar ekki er notast við sjálfvirkan tímatökubúnað og/eða stafrænar skeiðklukkur.

**SW 1.3** Aðili á vegum FINA ásamt nefndarmanni sundtækninefndar FINA skal með góðum fyrirvara fyrir keppni skoða og viðurkenna keppnislaug og tæknibúnað fyrir Ólympíuleika og heimsmeistaramót.

**SW 1.4** Þar sem neðanvatns myndbandsupptökutæki eru notuð af sjónvarpsstöðvum, skal búnaðurinn vera fjarstýrður og ekki hindra sjónsvið keppenda eða þrengja að þeim eða breyta lögun laugar eða hylja þær merkingar sem krafist er af FINA.

## SW 2 EMBÆTTISMENN

### SW 2.1 YFIRDÓMARI

**SW 2.1.1** Yfirdómari skal hafa fulla stjórn og vald yfir öllum embættismönnum, staðfesta skipan þeirra, og leiðbeina þeim með sérstakar aðstæður eða reglur sem heyra til keppninni. Hann skal framfylgja öllum reglum og ákvörðunum FINA og skera úr með allar spurningar er varða framkvæmd mótsins, einstakra greina og keppinnar yfirleitt, nema kveðið sé á um annað í reglunum.

**SW 2.1.2** Yfirdómari má grípa inn í keppnina hvenær sem er til að tryggja að reglum FINA sé framfylgt. Hann skal útkljá mál vegna mótmæla sem kunna að koma upp vegna keppinnar.

**SW 2.1.3** Þegar notast er við markdómara án þriggja (3) stafrænna skeiðklukkna, skal yfirdómari skera úr um röð keppenda sé þess þörf. Kanna skal niðurstöðu sjálfvirks tímatökubúnaðar, sé hann fyrir hendi og í gangi, eins og segir í SW 13.

**SW 2.1.4** Yfirdómari skal fullvissa sig um að allir embættismenn séu í sínum stöðum við framkvæmd móts. Hann getur skipað varamenn fyrir þá sem eru fjarverandi, óhæfir til starfans eða duglausir. Hann getur skipað embættismenn til viðbótar ef þörf krefur.

**SW 2.1.5** Í upphafi hvernar greinar skal yfirdómari gefa merki til keppenda með stuttum flautumerkjum um að afklæðast öllu nema sundfatnaði. Síðan gefur hann langt flautumerki sem gefur til kynna að keppendur skuli taka sér stöðu á rásþöllum (eða í baksundi og fjórboðsundi að fara strax í laugina). Annað langt flaut gefur keppendum í baksundi og fjórsundsboðsundi til kynna að þeir skuli tafarlaust taka sér stöðu. Þegar keppendur og embættismenn eru tilbúnir að hefja keppni, skal yfirdómari gefa merki með útréttum handlegg til ræsis um að keppendur séu nú undir hans stjórn. Yfirdómari heldur handleggnum útréttum þar til rásmerkið hefur verið gefið.

**SW 2.1.6** Ógilding vegna starts áður en rásmerki er gefið verður að vera séð og samþykkt bæði af ræsi og yfirdómara.

**SW 2.1.7** Yfirdómari skal dæma úr leik hvern þann keppanda sem hann sjálfur sér að brotið hefur reglur. Yfirdómara er einnig heimilt að dæma úr leik hvern þann keppanda sem aðrir embættismenn tilkynna að hafi brotið reglur. Allir ógildingardómar eru háðir úrskurði yfirdómara.

## **SW 2.2 TÍMATÖKUSTJÓRI**

**SW 2.2.1** Tímatökustjóri hefur yfirumsjón með sjálfvirkri tímatöku, þar með talið skoðun myndbandstímatöku.

**SW 2.2.2** Tímatökustjóri skal fara nákvæmlega yfir öll tölvuprentuð úrslit

**SW 2.2.3** Tímatökustjóri skal fara nákvæmlega yfir útprentaða tíma boðsundsskiptinga og tilkynna yfirdómara um öll þjófstört.

**SW 2.2.4** Tímatökustjóra er heimilt að styðjast við myndbandsupptöku til að staðfesta þjófstart.

**SW 2.2.5** Tímatökustjóri hefur umsjón með úrskráningum að loknum undanrásnum eða úrslitum, skráir úrslit á opinber eyðublöð, tiltekur öll ný met sem staðfest hafa verið og heldur utan um stigaskráningu eftir því sem við á.

## **SW 2.3 RÆSIR**

**SW 2.3.1** Ræsir skal hafa fullt vald á keppendum frá því yfirdómari hefur gefið honum merki um það (SW 2.1.5) þar til keppnin hefur hafist. Ræst skal samkvæmt SW 4.

**SW 2.3.2** Ræsir skal tilkynna yfirdómara um keppanda sem tefur ræsinguna eða á annan hátt vísitandi óhlýðnast fyrir mælum um ræsinguna, en aðeins yfirdómari má dæma keppanda úr leik fyrir slíka töf eða vísitandi brot við ræsinguna.

**SW 2.3.3** Ræsir hefur vald til að dæma um hvort ræsing sé sanngjörn og getur yfirdómari einn breytt þeirri ákvörðun.

**SW 2.3.4** Við ræsinguna keppnisgreinar skal ræsir standa við hlið laugar í um það bil 5 metra fjarlægð frá rásbrún, þar sem tímaverðir og keppendur sjá og/eða heyra rásmerkið.

## **SW 2.4 RIÐLASTJÓRI**

**SW 2.4.1** Riðlastjóri skal safna keppendum saman fyrir hverja grein.

**SW 2.4.2** Riðlastjóri skal tilkynna yfirdómara um öll brot sem hann kann að taka eftir varðandi auglýsingar (GR 6) og ef keppandi er ekki viðstaddur nafnakall.

## **SW 2.5 YFIRSNÚNINGSDÓMARI**

**SW 2.5.1** Yfirsúningsdómari skal tryggja að snúningsdómarar fari að skyldum sínum meðan á keppni stendur.

## **SW 2.6 SNÚNINGSDÓMARAR**

**SW 2.6.1** Einn snúningsdómari skal skipaður á hverja braut til beggja enda laugar, til að tryggja að keppendur fari eftir viðeigandi reglum varðandi ræsinguna, í hverjum snúningi og við lok sunds.

**SW 2.6.2** Lögsaga snúningsdómara við rásenda hefst við rásmerkið og lýkur við fyrsta handartak, nema í bringusundi þar sem það skal vera við handartak númer tvö.

**SW 2.6.3** Í hverjum snúningi er lögsaga snúningsdómara frá byrjun síðasta handartaks fyrir snertingu og þar til fyrsta handartaki er lokið, nema í bringusundi þar sem það skal vera við handartak númer tvö.

**SW 2.6.4** Lögsaga snúningsdómara við lok sunds hefst við byrjun síðasta handartaks fyrir snertingu.

**SW 2.6.5** Þegar baksundsstartbúnaður er notaður skal hver snúningsdómari við rásenda setja hann upp og fjarlægja hann.

**SW 2.6.6** Í 800 og 1500 metra einstaklingsgreinum skal sérhver snúningsdómari við rás- og snúningsenda laugar telja og skrá brautarlengdir hjá hverjum keppanda á hans braut. Keppandi skal látinn vita hversu margar brautarlengdir eru ósyntar með sérstökum talningaspjöldum (lap cards) sem sýna oddatölur við snúningsenda laugar. Heimilt er að nota rafrænan búnað, þar með talið skjá undir yfirborði vatns.

**SW 2.6.7** Sérhver snúningsdómari við rásenda laugar skal gefa keppanda á sinni braut merki þegar tvær laugarlengdir plús 5 metrar eru eftir af 800 og 1500 metra einstaklingsgreinum. Heimilt er að endurtaka merkið að loknum snúningi og þar til

keppandi hefur náð fimm (5) metra markinu á brautarlínunni. Merkið má gefa með flautu eða bjöllu.

**SW 2.6.8** Í boðsundum skal sérhver snúningsdómari ákvarða hvort næsti keppandi snerti enn ráspall þegar keppandi á undan snertir bakkann. Sé sjálfvirkur búnaður til staðar sem nemur slíkar skiptingar, skal honum beitt skv. SW 13.1.

**SW 2.6.9** Snúningsdómarar skulu tilkynna yfirdómara hvers konar brot, á undirrituðum kortum þar sem fram kemur riðill, grein, brautarnúmer, nafn keppanda og eðli brots.

## SW 2.7 TÆKNIDÓMARAR

**SW 2.7.1** Tæknidómarar skulu vera við hvora hlið laugar.

**SW 2.7.2** Tæknidómurum ber að tryggja að farið sé að þeim reglum sem gilda um útfærslu þeirrar sundgreinar sem keppt er í hverju sinni, sem og að fylgjast með snúningum og lokum sunds til aðstoðar snúningsdómurum.

**SW 2.7.3** Tæknidómarar skulu tilkynna til yfirdómara hvers konar brot, á undirrituðum kortum þar sem fram kemur riðill, grein, brautarnúmer, nafn keppanda, og eðli brots.

## SW 2.8 YFIRTÍMAVÖRÐUR

**SW 2.8.1** Yfirtímaförður skal skipa öllum tímavörðum í sætisstöðu og ákveða þeim brautir sem þeir ábyrgjast. Það er ráðlegt að þrjú (3) tímaverðir skulu vera á hverri braut. Þar sem ekki er notaður sjálfvirkur tímatökubúnaður, skal skipa tvo (2) tímaverði til viðbótar og skal hvor um sig taka við tímavörslu ef klukka tímavarðar fer ekki af stað eða stöðvast meðan á keppni stendur í einhverri grein eða mælir ekki tíma af einhverjum ástæðum. Þegar skeiðklukkur eru notaðar, eru lokatími og röð ákvörðuð út frá þeirri tímatöku.

**SW 2.8.2.** Þegar eingöngu er notast við einn (1) tímavörð á braut verður að tilnefna aukatímavörð ef bilun verður í skeiðklukku. Til viðbótar verður yfirtímaförður ætíð að skrá tíma fyrsta keppanda í hverjum riðli.

**SW 2.8.3** Yfirtímaförður skal safna saman kortum með skráðum tímum frá tímavörðum á hverri braut og, ef þörf krefur, skoða klukkur þeirra.

**SW 2.8.4** Yfirtímaförður skal skrá eða skoða staðfestan tíma á korti fyrir hverja braut.

## SW 2.9 TÍMAVERÐIR

**SW 2.9.1** Sérhver tímavörður skal taka tíma þeirra keppanda sem synda á þeirri braut sem honum er úthlutað, skv. SW 11.3. Ábyrgjast skal að klukkur séu réttar og uppfylli kröfur mótsstjórnar.

**SW 2.9.2** Sérhver tímavörður skal ræsa klukku sína við merki ræsis og stöðva hana þegar keppandi á hans braut lýkur sundinu. Yfirtímaförður getur farið fram á það við tímaverði að þeir skrái millitíma á vegalengdum lengri en 100 m.

**SW 2.9.3** Strax að loknu sundi skulu tímaverðir á hverri braut skrá tímana á klukkum sínum á tímakortið, afhenda það yfirtímaförði og láta skoða klukkur sínar sé þess

óskað. Klukkur skulu núllstilltar þegar yfirdómari gefur stutt flautumerki til að tilkynna keppni í næsta riðli.

**SW 2.9.4** Reynst getur nauðsynlegt að nota fullskipað lið tímavarða þrátt fyrir að sjálfvirkur tímatökubúnaður sé notaður, nema þegar notast er við myndbandaupptökubúnað.

## **SW 2.10 YFIRMARKDÓMARI – sé þess krafist**

**SW 2.10.1** Yfirmarkdómari skal skipa hverjum markdómara í sína stöðu og segja til um hvaða braut hann dæmir á.

**SW 2.10.2** Eftir keppni skal yfirmarkdómari safna saman frá hverjum markdómara undirrituðum blöðum með niðurstöðum, staðfesta niðurstöðurnar og úrslitasæti og senda síðan beint til yfirdómara.

**SW 2.10.3** Þar sem sjálfvirkur búnaður er notaður til að ákvarða úrslitaröð keppenda, skal yfirmarkdómari tilkynna úrslitin sem skráð eru með búnaðinum, eftir hverja keppni.

## **SW 2.11 MARKDÓMARAR – sé þess krafist**

**SW 2.11.1** Markdómarar skulu vera á upphækkuðum pöllum í beinni línu við endamark, þar sem þeir hafa alltaf gott útsýni yfir brautir og marklínu, nema þeir noti sjálfvirkan búnað á þeim brautum sem þeir sjá um og þrýsti á hnapp í lok keppni.

**SW 2.11.2** Eftir hverja grein skulu markdómarar ákvarða og skrá röð keppenda í samræmi við verkefnaskipan sína. Markdómarar, aðrir en þeir sem sjá um að þrýsta á hnappa, skulu ekki sinna tímavarðarstarfi í sömu grein.

## **SW 2.12 SKRÁNINGAREFTIRLIT (Desk Control)** (Nema á Ólympíuleikum og Heimsmeistaramótum)

**SW 2.12.1** Aðalritari er ábyrgur fyrir því að sannreyna úrslit frá tölvuútskrift eða úrslitátíma og röð keppenda í hverri grein sem hann fær frá yfirdómara. Aðalritari skal vitna um undirskrift úrslita frá yfirdómara.

**SW 2.12.2** Ritarar skulu henda reiður á úrsögnum eftir riðlakeppni eða úrslit, skrá úrslit á opinber eyðublöð, skrá öll ný met sem sett hafa verið og halda stigatöflu þegar við á.

## **SW 2.13 ÁKVARÐANIR EMBÆTTISMANNA**

**SW 2.13.1** Embættismenn mótsins skulu taka sjálfstæðar ákvarðanir og óháð hverjum öðrum nema annað sé tekið fram í sundreglunum.

## **SW 3 NIÐURRÖÐUN Í RIÐLA, UNÐANÚRSLIT OG ÚRSLIT**

Upphaf allra greina á Ólympíuleikum, Heimsmeistaramótum, svæðismótum og öðrum FINA keppnum er niðurröðun eftir árangri samkvæmt eftirfarandi reglum:

### **SW 3.1 RIÐLAR**



**SW 3.1.1** Bestu tímar keppenda yfir tilkynnt tímabil áður en skráningarfrestur fyrir viðkomandi keppni rennur út skulu lagðir fram á skráningarblöðum eða rafrænt eins og um er beðið og settir upp í lista eftir tímaröð af framkvæmdanefnd. Keppendur sem ekki leggja fram tíma skulu ákvarðaðir seinastir og skulu settir neðst á listann án tíma. Röðun keppenda með jafnan tíma eða fleiri keppenda með óskráðan tíma skal ákvarða með drætti. Keppendum skal raða á brautir samkvæmt þeim verklagsreglum sem getið er um í SW 3.1.2 hér á eftir. Keppendum skal raðað í riðla eftir framlögðum tímum á eftirfarandi hátt:

**SW 3.1.1.1** Sé aðeins um einn riðil að ræða skal líta á hann sem úrslit og hann syntur í úrslitum eingöngu.

**SW 3.1.1.2** Séu tveir riðlar, er fljótasta keppanda skipað í annan riðil, næst fljótasta í þann fyrsta, þriðja fljótasta í annan, fjórða fljótasta í fyrsta, o.s.frv.

**SW 3.1.1.3** Séu þrjú riðlar, nema í 400m, 800m og 1500m greinum, er fljótasta keppanda skipað í þriðja riðil, næst fljótasta í annan riðil og þriðja fljótasta í þann fyrsta. Fjórða fljótasta keppanda er skipað í þriðja riðil, fimmta fljótasta í annan riðil, sjötta fljótasta í fyrsta riðil, sjöunda fljótasta í þriðja riðil o.s.frv.

**SW 3.1.1.4** Séu fjórir eða fleiri riðlar, nema í 400m, 800m og 1500m greinum, er raðað í síðustu þrjú riðlana samkvæmt SW 3.1.1.3 hér að ofan. Í fjórða síðasta riðil koma þeir keppendur sem koma næstir að getu á eftir keppendum þriggja síðustu riðla. Í fimmta síðasta riðil koma þeir keppendur sem koma næstir að getu á eftir keppendum fjögurra síðustu riðla o.s.frv. Raðað er á brautir hvers riðils eftir lækandi röð framlagðra tíma í samræmi við það mynstur sem fram kemur í SW 3.1.2 hér að neðan.

**SW 3.1.1.5** Í 400m, 800m, og 1500m greinum á að raða síðustu tveimur riðlum greinar samkvæmt SW 3.1.1.2.

**SW 3.1.1.6** Undantekning: Séu tveir eða fleiri riðlar í sömu grein, skulu vera að lágmarki þrjú keppendur í undanrásariðli, en verði um úrsagnir úr keppni að ræða, getur það leitt til færri keppenda en þriggja í riðli.

**SW 3.1.1.7** Þegar keppt er í 10 brauta laug og tveir jafnir tímar eru skráðir fyrir áttunda sætið í riðlakeppni í 800m og 1500m metra skriðsundsgreinum skal dregið um hvor keppandi 8. og 9. brautar skal synda á 9. braut. Liggi fyrir þrjú (3) jafnir tímar í áttunda sæti skal nota brautir 9 og 0 og draga um hver syndir á brautum 8, 9 og 0.

**SW 3.1.1.8** Þar sem 10 brauta laug er ekki til staðar gilda ákvæði reglu SW 3.2.3.

**SW 3.1.2** Í öllum öðrum greinum en 50m greinum í 50m laugum skal skipað á brautir (braut 1 (0 í 10 brauta laug) er hægra megin séð frá rásenda) þannig að fljótasti keppandi eða lið fer á miðjubraut ef fjöldi brauta er oddatala, eða á braut 3 eða 4 í laugum með 6 eða 8 brautum. Í laugum með 10 brautum skal fljótasta keppandanum skipað á 4. braut. Keppandi með næst besta tíma er vinstra megin við þann besta, síðan raðast hinir til skiptis til hægri og vinstri samkvæmt framlögðum tímum. Keppendum sem hafa sama tíma er raðað að undangengnum drætti samkvæmt framangreindu mynstri.



**SW 3.1.3** Þegar keppt er í 50m greinum í 50m laugum getur keppni hafist hvort heldur frá rásenda eða snúningsenda laugar, samkvæmt ákvörðun mótsnefndar, og fer það eftir þáttum eins og sjálfvirkum búnaði, stöðu ræsis, o.s.frv. Mótsnefnd skal tilkynna keppendum um ákvörðun sína tímanlega fyrir keppni. Burtséð frá því hvoru megin laugar keppni hefst, er keppendum raðað á sömu brautir og þeim myndi raðað á ef þeir hæfu og lykju keppni við rásenda.

## **SW 3.2 UNÐANÚRSLIT OG ÚRSLIT**

**SW 3.2.1** Í undanúrslitum er skipað í riðla eins og lýst er í SW 3.1.1.2.

**SW 3.2.2** Þar sem ekki er þörf á undanrásum er skipað á brautir eins og getið er um í SW 3.1.2 hér að framan. Þegar undanriðlar eða undanúrslit hafa farið fram skal skipað á brautir eins og lýst er í SW 3.1.2 en þeir tímar lagðir til grundvallar sem náðst hafa í þeim riðlum.

**SW 3.2.3** Í greinum þar sem keppendur úr mismunandi eða sömu riðlum ná sama tíma upp á 1/100 hluta úr sekúndu í áttunda/tíunda eða sextánda/tuttugasta sæti, eftir því hvort keppt er á 8 eða 10 brautum, skulu þeir keppa um þau sæti sérstaklega fyrir úrslitasund. Slíkar keppnir skulu fara fram eftir að allir viðkomandi keppendur hafa lokið sínum riðlum á tíma sem mótshaldari og keppendur eru sammála um. Nái keppendur enn sama tíma þurfa þeir að endurtaka keppnina um sætið. Ef nauðsyn krefur skal keppa sérstaklega um sæti fyrsta og annars varamanns ef þeir hafa áður synt á sama tíma.

**SW 3.2.4** Þegar einn eða fleiri keppendur segja sig úr keppni í úrslitum eða undanúrslitum, koma varamenn inn eftir úrslitum úr riðlum eða undanúrslitum. Þá verður að endurraða keppendum í greinina og gefa verður út viðbótarkeppnisblöð þar sem breytingar koma fram í smáatriðum, eins og mælt er fyrir um í SW 3.1.2.

**SW 3.2.5** Í riðlakeppni, undanúrslitum og úrslitum skulu keppendur mæta í fyrsta riðlaherbergið á uppgefnum tíma mótstjórnar. Að undangenginni skoðun fara keppendur í síðasta riðlaherbergið.

**SW 3.3** Á annars konar mótum er heimilt að draga um röðun keppenda á brautir.

## **SW 4 RÆSING (start)**

**SW 4.1** Ræsing í skriðsundi, bringusundi, flugsundi og fjórsundi fer fram með stungu. Við langt flaut (SW 2.1.5) frá yfirdómara, skulu keppendur stíga upp á rásalla og bíða þar. Þegar ræsir tilkynnir „takið ykkur stöðu“ skulu keppendur tafarlaust taka sér rásstöðu með að minnsta kosti annan fótinn fremst á rásalli. Staða handanna skiptir ekki máli. Þegar allir keppendur eru í kyrrstöðu, skal ræsir gefa rásmerkið.

**SW 4.2** Ræsing í baksundi og fjórsundsboðsundi skal fara fram í vatni. Við fyrsta langa flaut yfirdómara (SW 2.1.5) skulu keppendur strax fara í laugina. Við annað langa flaut yfirdómara skulu keppendur fara tafarlaust í rásstöðu (SW 6.1). Þegar allir keppendur hafa komið sér í rásstöðu skal ræsir gefa rásmerkið „takið ykkur stöðu“. Þegar allir keppendur eru í kyrrstöðu skal ræsir gefa rásmerkið.

**SW 4.3** Á Ólympíuleikum, Heimsmeistaramótum og öðrum mótum á vegum FINA skal skipunin „takið ykkur stöðu“ vera á ensku (e. take your marks) og skal ræsing koma frá hátölurum sem komið er fyrir við hvern ráspall.

**SW 4.4** Keppandi sem stingur sér áður en rásmerki er gefið skal dæmdur úr leik. Ef rásmerki hljómar áður en lýst hefur verið yfir að keppandi hafi verið dæmdur úr leik, skal keppni fram haldið og keppandi eða keppendur dæmdir úr leik við lok sundsins. Hafi keppandi verið dæmdur úr leik áður en rásmerki hefur verið gefið, skal það ekki gefið, heldur skulu þeir keppendur sem eftir eru kallaðir til baka og síðan endurræstir. Yfirdómari endurtekur framkvæmd ræsingar með því að gefa fyrst langt flaut (seinna flautið í baksundi) eins og kveðið er á um í SW 2.1.5.

## SW 5 SKRÍÐSUND

**SW 5.1** Í skriðsundsgreinum má beita hvaða sundaðferð sem er, nema í fjórsundi og fjórsundsboðsundi, þar sem skriðsund þýðir hvaða sund sem er nema baksund, bringusund eða flugsund.

**SW 5.2** Einhver líkamshluti keppandans verður að snerta bakkann við hvern snúning og við lok sunds.

**SW 5.3** Einhver líkamshluti keppandans verður að brjóta vatnsyfirborðið í keppninni. Þó er keppanda heimilt að vera algjörlega í kafi við snúning og í allt að 15 metra eftir snúning og start. Þá verður höfuð að hafa brotið vatnsyfirborðið.

## SW 6 BAKSUND

**SW 6.1** Áður en rásmerki er gefið skulu sundmenn taka sér stöðu í vatninu með andlitið að rásenda laugarinnar og báðar hendur á viðbragðshöldum ráspallsins. Óheimilt er að standa í eða á yfirfallsrennu laugarinnar eða beygja tær yfir brún rennunnar. Þegar notaður er baksundsstartbúnaður í upphafi sunds, verða tær á báðum fótum að vera í snertingu við endavegg eða yfirborð snertiplatta (e. touchpad). Bannað er að beygja tær yfir toppbrún snertiplatta.

**SW 6.2** Við rásmerki og eftir snúning skal keppandi spyrna frá og synda á bakinu út sunðið, nema í snúningi, eins og kveðið er á um í SW 6.5. Eðlileg stelling á bakinu getur falið í sér snúningshreyfingu á bol allt að, en þó ekki svo mikla að nemi 90° frá láréttu plani. Höfuðstelling skiptir ekki máli.

**SW 6.3** Einhver líkamshluti keppandans verður að brjóta vatnsyfirborðið í keppninni nema í og eftir snúning. Leyfilegt er að keppandi syndi algjörlega í kafi í snúningi og í allt að 15 metra eftir start og snúning. Þá verður höfuð að hafa brotið vatnsyfirborðið.

**SW 6.4** Við framkvæmd snúnings verður einhver hluti líkama keppanda að snerta laugarbakkann á þeirri braut sem hann syndir á. Í snúningi er leyfilegt að færa axlir úr hliðarstöðu í bringustöðu og framkvæma síðan strax eina samfellda armhreyfingu með öðrum eða báðum handleggjum til að hefja snúninginn. Sundmaður skal vera kominn í bakstöðu þegar spyrnt er frá bakka.

**SW 6.5** Við lok sunds verður keppandi að snerta bakkann meðan hann er enn á bakinu á sinni eigin braut.

## **SW 7 BRINGUSUND**

**SW 7.1** Eftir ræsingu og að loknum hverjum snúningi er sundmanni heimilt að taka eitt handatak niður með síðum og alveg niður að fótleggjum og má sundmaður þá vera í kafi. Hvenær sem er fyrir fyrsta bringusundsfótatak eftir start og eftir hvern snúning er leyfilegt að framkvæma eitt flugsundsfótatak. Höfuðið verður að rjúfa yfirborð vatns áður en hendur færast að líkamanum eftir víðasta hluta annars handartaks.

**SW 7.2** Frá upphafi fyrsta handataks eftir ræsingu og eftir hvern snúning skal líkami sundmanns vera í bringustöðu. Aldrei er leyfilegt að velta yfir á bakið nema við snúning eftir að búið er að snerta sundlaugarvegginn, þá er leyfilegt að snúa hvernig sem er svo fremi að líkaminn sé í bringustöðu þegar synt er frá aftur. Frá ræsingu og út alla keppnina skal hvert sundtak samanstanda af einu handtaki og einu fótataki í framangreindri röð. Allar hreyfingar handleggja skulu vera jafnhliða og í láréttu plani án víxlhreyfinga.

**SW 7.3** Ýta skal höndum fram saman frá bringu á, undir eða yfir vatnsyfirborði. Olnbogar skulu vera undir vatnsyfirborði nema í lokataki fyrir snúning, í snúningi og í lokataki sundsins. Hendur skal síðan færa aftur, á eða undir vatnsborði. Hendur skulu ekki færðar lengra aftur en að mjaðmalínu, nema í fyrsta sundtaki eftir stungu og snúning.

**SW 7.4** Í hverju sundtaki verður einhver hluti höfuðs sundmanns að rjúfa vatnsflötinn. Allar fótahreyfingar skulu vera samsíða og fætur í sömu láréttu stöðunni án nokkurra víxlhreyfinga.

**SW 7.5** Fætur skulu vísa út á við í framknúningshluta fótataksins. Víxlhreyfingar eða sporðhreyfingar eru ekki leyfilegar utan þess sem tilgreint er í SW 7.1. Heimilt er að rjúfa vatnsflötinn með fótunum nema ef því fylgir sporðsundtak.

**SW 7.6** Við hvern snúning og við lok sunds skal snerta bakkann með báðum höndum aðskildum og samtímis; í, yfir eða undir vatnsyfirborði. Í síðasta sundtaki fyrir snúning og í lok sunds er leyfilegt að nota eingöngu handatak, ekki þarf fótatak að fylgja á eftir. Færa má höfuð í kaf eftir að hendur hafa verið dregnar aftur í síðasta sundtaki fyrir snertingu bakka, með því skilyrði að það brjóti vatnsborðið einhvern tíma sundtaksins fyrir snertingu.

## **SW 8 FLUGSUND**

**SW 8.1** Frá upphafi fyrsta handsundtaks eftir stungu og eftir hvern snúning skal synda á bringunni. Aldrei er heimilt að velta yfir á bakið, nema við snúning eftir að búið er að snerta sundlaugarvegginn, þá er leyfilegt að snúa hvernig sem er meðan að líkaminn er í bringustöðu þegar synt er út aftur.

**SW 8.2** Færa verður báða handleggi fram samtímis yfir vatnsyfirborði og draga þá aftur einnig samtímis undir vatnsyfirborði út alltundið eins og kveðið er á um í SW 8.5.

**SW 8.3** Allar fótahreyfingar skulu vera samsíða. Ekki er nauðsynlegt að hafa fætur og fótleggi í nákvæmlega sömu hæð en engar víxlhreyfingar eru leyfilegar. Bringusunds-spörk eru ekki leyfileg.

**SW 8.4** Í hverjum snúningi og við lok sunds skal snerta bakkann með báðum höndum aðskildum og samtímis, í, yfir eða undir vatnsborði.

**SW 8.5** Eftir stungu og snúninga er leyfilegt að taka eitt eða fleiri fótasundtök og eitt handasundtak í kafi en þessi sundtök verða að færa keppandann upp á vatnsyfirborðið. Leyfilegt er að keppandi syndi algjörlega í kafi í allt að 15 metra eftir stungu og snúning en þá verður höfuðið að koma upp úr og brjóta vatnsyfirborðið. Keppandi verður að synda við vatnsyfirborð þar til í næsta snúningi eða að sundi lýkur.

## **SW 9 FJÓRSUND**

**SW 9.1** Í einstaklingskeppni í fjórsundi syndir keppandi sundgreinarnar fjórar í eftirfarandi röð: flugsund, baksund, bringusund og skriðsund. Hver sundaðferð verður að ná yfir einn fjórða hluta ( $\frac{1}{4}$ ) vegalengdarinnar.

**SW 9.2** Í skriðsundi verður keppandinn að vera á bringunni, nema í snúningi. Keppandi verður að vera kominn á bringuna áður en fótatök eða handatök hefjast.

**SW 9.3** Í boðsundskeppni í fjórsundi synda keppendur sundgreinarnar fjórar í þessari röð: Baksund, bringusund, flugsund og skriðsund. Hver sundaðferð verður að ná yfir einn fjórða hluta ( $\frac{1}{4}$ ) heildar vegalengdarinnar.

**SW 9.4** Hverjum hluta verður að ljúka í samræmi við reglur viðkomandi sundgreinar.

## **SW 10 KEPPNIN**

**SW 10.1** Í allri einstaklingskeppni skulu kynin aðskilin eftir greinum.

**SW 10.2** Keppandi sem syndir vegalengdina einn, verður að ljúka henni að fullu til að sundið sé gilt.

**SW 10.3** Keppandi verður að synda og ljúka keppni á sömu braut og hann hóf sundið.

**SW 10.4** Í öllum sundgreinum verður keppandi að snerta bakkann í snúningum. Snúningur verður að vera frá laugarbakka og ekki er leyfilegt að klofa eða taka skref á botni laugar.

**SW 10.5** Í skriðsundsgreinum og skriðsundshluta fjórsunds er ekki bannað að stíga á botn laugar en bannað er að ganga.

**SW 10.6** Bannað er að toga í brautarlínu.

**SW 10.7** Ef keppandi hindrar annan keppanda, með því að synda í veg fyrir hann eða trufla á annan hátt, dæmist lögbrjótur úr leik. Sé um ásetningsbrot að ræða, skal yfirdómari tilkynna um málið til skipuleggjanda mótsins og aðildarsambands viðkomandi lögbrjótis.

**SW 10.8** Keppendum er ekki leyfilegt að nota eða klæðast nokkurs konar hjálparbúnaði eða sundfatnaði sem eykur á hraða þeirra, flothæfni eða þrek í keppni (svo sem hanska með sundfitum, sundblöðkum, ugga, orkuböndum (e. power bands) eða límefti og öðru þess háttar). Sundgleraugu eru heimil. Hvers kyns bönd um líkamann eru bönnuð nema íþróttalæknaneftir FINA hafi heimilað notkun þeirra.

**SW 10.9** Ef keppandi sem ekki er skráður í tiltekna keppni fer í laugina á meðan aðrir keppendur hafa ekki lokið sinni keppni skal hann dæmdur úr leik í næstu grein mótsins sem hann er skráður í.

**SW 10.10** Í boðsundsgreinum skulu vera fjórir keppendur í hverju liði. Boðsund með blönduðum sveitum er leyft. Blandaðar sveitir verða að samanstanda af tveimur (2) mönnum og tveimur (2) konum. Millitíma í boðsundi með blandaðri sveit er ekki hægt að nota til skráningar meta eða skráningar í aðra keppni.

**SW 10.11** Í boðsundi dæmist boðsundssveit keppanda ógild ef hann í boðsunds-skiptingum sleppir fótum af rásfalli áður en keppandinn á undan honum í sömu sveit hefur snert bakkann.

**SW 10.12** Dæma skal boðsundssveit úr leik ef einhver keppandi hennar, annar en sá sem skráður er í tiltekinn hluta boðsunds, fer í laugina á meðan á keppni stendur, áður en allir keppendur allra sveita boðsundsins hafa lokið keppni.

**SW 10.13** Meðlimi boðsundssveitar og röð þeirra í boðsundinu verður að tilkynna fyrir keppni. Sérhver keppandi í boðsundssveit má aðeins synda einn sprett í boðsundinu. Samsetningu boðsundssveitar má breyta milli undanrásu og úrslita í tiltekinni grein svo fremi sem keppendur séu skráðir til keppni í þá grein af viðkomandi sundsambandi. Syndi keppendur í annarri röð en skráð hefur verið, skal sveitin öll dæmast úr leik. Varamenn má einungis kalla til í heilsufarslegu neyðartilviki sem hefur verið tilkynnt um áður.

**SW 10.14** Keppandi sem lokið hefur keppni í einstaklingsgrein eða sínum hluta í boðsundsgrein verður að fara úr lauginni eins fljótt og auðið er án þess að hindra aðra keppendur sem ekki hafa lokið keppni. Að öðrum kosti skal hann eða lið hans dæmt úr leik.

**SW 10.15** Leiði brot annars til þess að keppandi nær ekki þeim árangri sem hann annars hefði náð, hefur yfirdómari vald til að leyfa honum að keppa í næsta riðli eða, ef um úrslitasund er að ræða eða síðasta riðil í grein, getur hann gefið skipun um að láta endurtaka sundið.

**SW 10.16** Ekki er leyfilegt að gefa takt (e. pace-making) eða nýta sér einhvers konar tæki eða áætlun sem hefur þess konar áhrif.

## SW 11 TÍMATAKA

**SW 11.1** Starfræksla sjálfvirks tímatökubúnaðar skal vera í höndum skipaðra embættismanna. Tímar sem skráðir eru af sjálfvirkum tímatökubúnaði skulu notaðir til að ákvarða sigurvegara, röð keppenda og tíma á hverri braut. Röð og tímar þannig ákvarðaðir skulu teknir fram yfir niðurstöður tímavarða. Í tilvikum þar sem sjálfvirkur búnaður bilar eða augljóst þykir að villa í búnaði hafi átt sér stað, eða ef keppandi virkjar (ræsir) ekki búnaðinn, skulu skráningar tímavarða ráða úrslitum (sjá SW 13.3).

**SW 11.2** Við notkun sjálfvirks tímatökubúnaðar skulu úrslit skráð í 1/100 úr sekúndu. Ef keppendur fá sama tíma upp á 1/100 úr sekúndu skal þeim úthlutað sama sæti. Tímar sem sýndir eru á rafrænni stígatöflu skulu aðeins vera upp á 1/100 úr sekúndu.

**SW 11.3** Hvers konar tímatökubúnaður sem stöðvaður er af embættismanni skal talinn vera skeiðklukka. Slíka handvirka tímatöku verður að framkvæma af þremur tímavörðum sem tilnefndir og viðurkenndir hafa verið af sundsambandi viðkomandi aðildarlands. Ábyrgjast skal



að allar skeiðklukkur uppfylli skilyrði mótsstjórnar. Handvirk tímataka skal skráð upp á 1/100 úr sekúndu. Þegar ekki er notaður sjálfvirkur tímatökubúnaður skal staðfestur tími með handvirkum búnaði ákvarðaður með eftirfarandi hætti:

**SW 11.3.1** Ef tvær (2) skeiðklukkur af þremur (3) sýna sama tíma, en sú þriðja annan, skal tími hinna tveggja samhljóða gilda.

**SW 11.3.2** Ef allar þrjár (3) klukkurnar eru ósamhljóða, gildir tími þeirrar sem er í miðið.

**SW 11.3.3** Ef aðeins tvær (2) af þremur (3) klukkum mæla tíma skal meðaltími þeirra tveggja gilda.

**SW 11.4** Verði keppandi dæmdur úr leik á meðan á grein stendur eða eftir hana, skal geta um það í staðfestum úrslitum, án þess að tími eða röð sé skráð eða kynnt.

**SW 11.5** Verði boðsundssveit dæmd úr leik skal skrá löglega millitíma fram að broti í úrslitagögn.

**SW 11.6** Allir 50m og 100m millitímar skulu skráðir hjá fyrstu keppendum í boðsundum og birtir í úrslitagögnum.

## SW 12 HEIMSMET

**SW 12.1** Vegna heimsmeta og heimsmeta ungmenna í 50m brautum eru eftirfarandi vegalengdir og sunaðferðir viðurkenndar fyrir bæði kyn:

**Skriðsund:** 50, 100, 200, 400, 800 og 1500 metrar

**Baksund:** 50, 100 og 200 metrar

**Bringusund:** 50, 100 og 200 metrar

**Flugsund:** 50, 100 og 200 metrar

**Einstaklingsfjórund:** 200 og 400 metrar

**Skriðsundsboðsund:** 4x100 og 4x200 metrar

**Fjórundsboðsund:** 4x100 metrar

**Blandað boðsund:** 4x100 metra skriðsund og 4x100 metra fjórund.

**SW 12.2** Vegna heimsmeta og heimsmeta ungmenna í 25m brautum eru eftirfarandi vegalengdir og sunaðferðir viðurkenndar fyrir bæði kyn:

**Skriðsund:** 50, 100, 200, 400, 800 og 1500 metrar.

**Baksund:** 50, 100 og 200 metrar.

**Bringusund:** 50, 100 og 200 metrar.

**Flugsund:** 50, 100 og 200 metrar.

**Einstaklingsfjórund:** 100, 200 og 400 metrar.

**Skriðsundsboðsund:** 4x50, 4x100 og 4x200 metrar.

**Fjórundsboðsund:** 4x50 og 4x100 metrar

**Blandað boðsund:** 4x50 metra skriðsund og 4x50 metra fjórund.

**SW 12.3** Aldursflokkar fyrir heimsmet ungmenna eru þeir sömu og samkvæmt FINA Heimsmestaramóti í sundi ungmenna.

**SW 12.4** Liðsmenn boðsundssveitar verða að vera af sama þjóðerni.



**SW 12.5** Öll met verða að vera slegin á löglegu móti eða í einstaklingskeppni með tímatöku sem haldin er opinberlega og tilkynnt með auglýsingu að minnsta kosti þremur dögum fyrir áætlaða tilraun. Ef aðildarsamband hefur samþykkt einstaklingskeppni með tímatöku sem hluta af móti er óþarft að auglýsa tilraunina með minnst þriggja (3) daga fyrirvara.

**SW 12.6** Lengd brauta í laug skal staðfest af mælingamanni eða öðrum viðurkenndum embættismanni sem skipaður hefur verið eða viðurkenndur er af aðildarsambandi viðkomandi lands.

**SW 12.7** Þar sem færanlegt millipil er notað verður að staðfesta mælingu á lengd brautarinnar við lok þess mótshluta þegar tímanum var náð.

**SW 12.8** Heimsmet og heimsmet ungmenna eru aðeins talin gild ef þau hafa verið mæld með sjálfvirkum tímatökubúnaði eða hálfsvirkum búnaði ef upp hefur komið kerfisvilla í hinum sjálfvirka búnaði.

**SW 12.9** Heimsmet og heimsmet ungmenna eru aðeins talin gild ef sundmaður hefur klæðst sundfatnaði sem viðurkenndur hefur verið af FINA.

**SW 12.10** Tímar sem eru jafnir að 1/100 hluta úr sekúndu eru viðurkenndir sem jöfn met og sundmenn sem náð hafa þessum tímum kallast þá „sameiginlegir methafar“. Einungis er heimilt að leggja fram tíma sigurvegara í keppni sem heimsmet – nema sem heimsmet ungmenna. Komi til jafnteflis í keppni um met skulu þeir keppendur sem skildu jafnir teljast sigurvegarar.

**SW 12.11** Heimsmet og heimsmet ungmenna er einungis hægt að setja þar sem minna en 3 gr/lítra af salti eru í vatninu. Engin heimsmet eru viðurkennd fyrir sund í sjávar- eða úthafsvatni.

**SW 12.12** Fyrsti sundmaður í boðsundi, nema úr blandaðri boðssundssveit, getur sótt um að tími hans sé skráður sem heimsmet eða heimsmet ungmenna. Ljúki sundmaður í boðssundssveit vegalengd sinni á mettíma samkvæmt ákvæðum þessarar greinar skal ekki nema úr gildi árangur hans þó sveitin sé dæmd ógild vegna brots sem á sér stað eftir að viðkomandi vegalengd hefur verið synt.

**SW 12.13** Keppandi í einstaklingsgrein getur sótt um að tími í millivegalengd sé skráður sem heimsmet eða heimsmet ungmenna ef hann, þjálfari hans eða liðsstjóri óskar eftir því við yfirdómara að millitíminn sé sérstaklega mældur eða ef tími í millivegalengd er skráður með sjálfvirkum tímatökubúnaði. Keppandi sem óskar eftir slíkri skráningu verður að ljúka keppni í viðkomandi grein til að geta sótt um skráningu mets í millivegalengd.

**SW 12.14** Skipuleggjendur móts eða mótsnefnd þurfa að skila inn umsóknum um heimsmet eða heimsmet ungmenna á opinberum eyðublöðum FINA. Eyðublöð þurfa að bera undirritun viðurkennds fulltrúa aðildarsambands í heimalandi sundmanns og votta að öllum reglum hafi verið fullnægt, þar með talið öflun vottorðs um neikvæða niðurstöðu lyfjaprófs (DC 5.3.2.2). Skila skal umsóknareyðublaði til framkvæmdastjóra FINA innan fjórtán (14) daga frá því að viðkomandi árangri var náð.

**SW 12.15** Bráðabirgðatilkynning um tilkall til heimsmets eða heimsmets ungmenna skal send framkvæmdastjóra FINA í tölvupósti eða símbréfi innan sjö (7) daga frá því að viðkomandi árangri var náð.

**SW 12.16** Aðildarsamband í heimalandi sundmanns skal tilkynna um árangurinn í bréfi til framkvæmdastjóra FINA til upplýsinga og aðgerða, ef nauðsyn krefur, til að tryggja að hin opinbera umsókn hafi fengið rétta meðferð af hálfu viðkomandi stjórnenda.

**SW 12.17** Þegar opinber umsókn um met hefur verið móttækin og þegar sannreynt hefur verið að upplýsingar þær sem gefnar eru í umsókninni, þar með talið vottorð um neikvæða niðurstöðu lyfjaprófs, eru réttar, skal framkvæmdastjóri FINA staðfesta hið nýja heimsmet eða heimsmet ungmenna, sjá til þess að upplýsingar þar að lútandi séu birtar og sjá til þess að viðurkenningar séu sendar þeim aðilum sem fengið hafa umsóknir sínar samþykktar.

**SW 12.18** Öll met sem sett eru á Ólympíuleikum, Heimsmeistaramótum, Heimsmeistaramótum ungmenna og Heimsbikarmótum skulu samþykkt sjálfkrafa.

**SW 12.19** Ef verklagsreglum þeim sem kveðið er á um í SW 12.14 hefur ekki verið framfylgt getur aðildarsamband í heimalandi sundmanns sótt um skráningu heimsnets eða heimsnets ungmennis vegna vanrækslu á þessari framkvæmd. Að undangenginni rannsókn hefur framkvæmdastjóri FINA heimild til að samþykkja slíkt met ef fullyrðing þar um telst vera rétt.

**SW 12.20** Ef umsókn um heimsnet eða heimsnet ungmenna er samþykkt af hálfu FINA skal framkvæmdastjóri FINA senda aðildarsambandi í heimalandi sundmannsins viðurkenningarskjal með undirritun forseta FINA og skal það afhendast sundmanninum sem viðurkenning á árangri hans. Fimmta viðurkenningarskjalið vegna heimsnets er gefið út til handa því aðildarsambandi sem á innan sinna vébanda boðsundssveit sem sett hefur heimsnet eða heimsnet ungmenna. Þetta viðurkenningarskjal hefur aðildarsambandið í sinni vörslu.

**SW 12.21** Öðru hverju getur FINA bætt við nýjum greinum þar sem sundmenn geta sett heimsnet eða heimsnet ungmenna. Fyrir hverja slíka grein mun FINA setja marktíma; ef sundmaður nær betri tíma en marktíminn er, þá skal það vera álitíð heimsnet eða heimsnet ungmenna, svo fremi að öll skilyrði SW 12 eru uppfyllt.

## **SW 13 VERKLAGSREGLUR FYRIR SJÁLFVIRKA TÍMATÖKU**

**SW 13.1** Þegar notaður er sjálfvirkur tímatökubúnaður (sjá FR 4) skulu röðun og tímar sem mældir eru, sem og skiptingar í boðsundum, sem dæmdar eru með slíkum búnaði hafa forgang fram yfir tímaverði og snúningsdómara.

**SW 13.2** Þegar sjálfvirkur tímatökubúnaður skráir ekki röðun og/eða tíma eins eða fleiri sundmanna í tiltekinni keppni:

**SW 13.2.1** Skrá alla tiltæka röðun og tíma mælda með sjálfvirkum búnaði.

**SW 13.2.2** Skrá alla röðun og tíma sem tímaverðir mæla.

**SW 13.2.3** Opinber röðun er ákvörðuð sem hér segir:

**SW 13.2.3.1** Sundmaður sem fengið hefur röðun og tíma mældan með sjálfvirkum búnaði skal halda röðun sinni miðað við aðra sundmenn með tíma og röðun úr sjálfvirkum búnaði í sömu keppni.

**SW 13.2.3.2** Sundmanni sem ekki hefur fengið röðun mælda með sjálfvirkum búnaði en hefur fengið tíma mældan með sjálfvirkum búnaði er raðað með því að bera saman sjálfvirkan tíma hans og sjálfvirkan tíma hinna sundmannanna.

**SW 13.2.3.3** Sundmanni sem hvorki hefur fengið sjálfvirka röðun né sjálfvirkan tíma skal raðað samkvæmt þeim tíma sem mældur hefur verið með hálf sjálfvirkum búnaði eða þremur stafrænum skeiðklukkum.

**SW 13.3** Opinber tími er ákvarðaður sem hér segir:

**SW 13.3.1** Opinber tími allra sundmanna sem mældir eru með sjálfvirkum búnaði er sá tími.

**SW 13.3.2** Opinber tími allra sundmanna sem ekki eru mældir með sjálfvirkum búnaði er tími mældur með þremur skeiðklukkum eða hálf sjálfvirkum búnaði.

**SW 13.4** Til að ákvarða hlutfallslega röðun árangurs í öllum riðlum greinar skal farið að eftirfarandi:

**SW 13.4.1** Hlutfallsleg röðun allra keppenda er fengin með því að bera saman opinbera tíma þeirra.

**SW 13.4.2** Ef keppandi hefur fengið opinberan tíma sem er jafn opinberum tíma/tímum eins eða fleiri keppenda skal öllum keppendum með sama tíma raðað sem jöfnum í úrslitum viðkomandi greinar.

## **ALDURSFLOKKAREGLUR – SUND**

**SWAG 1** Aðildarsambönd geta tekið upp sínar eigin aldursflokkareglur samkvæmt FINA tæknireglum.